

DOMINGU XXVII TEMPU KOMÚN – TINAN C

Tema

Iha Maromak nia Liafuan ohin nian, it ahetan tema oioin (fiar, salvasaun, radikalidade iha “dalan Reinu nian, nst); maibé reflesau kona-ba atitude loos ema nian iha Maromak nia oin mak tema evidente liu. Leitura sira konvida ita atu rekoñese, ho haraik-an, ita-nia ani ne’ebé ki’ik , ita-nia finitide, atu dedika an ba Reinu laho kálkulu eh ezijénsia, atu simu ho gratidaun Maromak nia don sira no saran an ho konfiansa iha Ninia liman.

Iha primeira leitura, profeta Habacuc interpela Maromak, husu Nia atu intervein iha mundu no hakotu violénsia, injustisa no salan... Maromak, konfirma nia intensaun atu aiha mundu, hodi harahun mate no opresaun; maibé Nia sei hala’o ne’e iha momentu oportunu, tuir Ninia projetu; ema presiza de’it konfia no hein ho pasiénsia “Maormak nia tempu”.

Evanjellu konvida eskolante sira atu adere, ho aten-barani no radikalidade, ba projetu moris nian ne’ebé Maromak mai oferese, liuhusi Jezús... Adezaun ne’e mak ita hanaran “fiar”. Eskolante sira tenke iha konxiénsia katak sira mak instrumentu de’it, no liuhusi sira Maromak hala’o salvasaun. Eskolante sira presiza de’it hala’o knaar ne’e ho haraik-an no gratuidade, hanesan “atan sira ne’ebé hala’o de’it buat ne’ebé sira tenke halo”.

Leitura daruak konvida eskolante sira atu hafoun loroloron kompromisu ho Jezús Kristu no ho Reinu. Ho forma esepesial, autór husu animadór sarani sira atu gia komunidadade sira ho fortaleza, ekuilíbriu no domin no defende nafatin lialoos *Evanjellu* nian.

LEITURA I – Hab 1,2-3; 2,2-4

Kona-ba Habacuc, ita la hatene buat ida: título livru nian la hatudu buat ida kona-ba profeta nia fatin moris nian, nein tempu istóriu profeta nian. Hodi temi ema “kaldeu” sira (Hab 1,6) parese situa proklamasau Habacuc nian iha tempu ne’ebé babilóniu sira, hamonu tiha impériu assíriu, buka impoin sira-nia domínio ba povu sira Kanaan nian. Se nune’e, ita iha sékulu VII mK nia rohan...

Liurai Judá nian, iha altura ne’e mak Joaquim (609-598 mK). Nia mak liurai fraku ida, inkompetente, ne’ebé esplora povu, husik aumenta injustisa sira no hakle’an kuak entre ema riku no kiak sira; nia mós dezenvolve aliansa ho kbiit sira época nian... Judá sente todan imperializmu babilóniu no tenek selu tributu ba Nabucodonosor. Jerusalém monu iha babilóniu sira nia liman, Joaquim mate no deportasaun ba Babilónia, liurai nia oan no parte signifikativa klase dirijente Judá nian (primeira deportasaun: 597mK).

MENSAJEN

Ita-nia testu hahú ho profeta nia hakilar: “to’o bainhira Na’i, ha’u bolu no Ita la rona? TO’o bainhira ha’u haklar ‘violénsia’, no ita la salva ha’u (Hab 1,2)... Habacuc hakilar ninia impasiénsia (nia povu nian); nia la komprende oinsá Maromak bele hateke de’it funu no hahalok aat sira iha ninia tempu... Habacuc la komprende tan sá Maromak la hakotu violasaun sira kontra Ninia projetu ba mundu. Profeta ne’e la limita an de’it atu rona Jahwéh nia Liafuan no hatutan nia; maibé nia rasik foti inisiativa, husu Maromak, ezije resposta. No hanesan, guarda kalan nian ne’ebé matan-moris, nia hein atu Maromak justifika nia an (kf. Hab 2,1).

Finalmente, Maromak hatán. Nia mensajen mak esperansa nian, basá Nia hatudu katak Nia la

indiferente hasoru aat ne'ebé hafoer mundu, no katak momentu vingansa Maromak nian atu to' o daudaun; ema, presiza hein de'i ho pasiénsia tempu asaun Maromak nian (kf. Hab 2,2-5): iha tempu ne'ebá ema loko-an no prepotente sei simu kastigu no ema justu sei hetan hahi'in.

LEITURA II – 2 Tim 1,6-8.13-14

Surat daruak ba Timóteo kontein, hanesan ida dahuluk nian, konsellu pastorál sira Paulo fó ba ninia kolaboradór no susesor iha animasaun Kreda sira Ázia nian: Timóteo ne'ebé akompaña nia iha viajen misionária sira no tuir tradisaun, sai bispu Éfeso nian.

Maski ita duvida katak Paulo mak autór surat ne'e nian, ida-ne'ebé hakerek apresenta an nu'udar Paulo no hateten katak nia iha prizaun no sente besik atu mate. Nia husu maka'as ba Timóteo atu persevera iha ministériu no konserva doutrina loos. Timóteo nu'udar representante animadór hotu comunidade sarani nian, hetan konvite atu mantein fiél ba ministériu no doutrina ne'ebé simu husi apóstolu sira.

MENSAJEN

Autór surat nian husu Timóteo atu hamoris fali karizma ne'ebé simu bainhira Paulo no katuas sira tau liman iha nia leten, hodi konsagra nia ba ministériu apostóliku (vers. 6-8). Ne'e mak pedidu lójiku ida: maski foti ona desizaun fundamentál atu saran an ba Maromak no maluk sira, desizaun ne'e presiza atu hakle'an no konfirma loron ba loron... Deziluzau sira, frakasu sira, monotonia, frajilidade umana hamenus entuziazmu orijinál; nune'e, presiza atu momentu hotu, deskobre filafali sentidu opsaun fundamentál sira-nian, ne'ebé eskolante halo tempu ida liubá. Kualidade fundamentál tolu ne'ebé apóstolu tenke iha mak fortaleza iha difikuldade sira, domin ne'ebé dudu atu saran an totál ba Kristu no maluk sira no prudénsia (moderasaun) ne'ebé presiza atu anima no orienta comunidade.

Iha segunda parte testu nian (vers. 13-14), Timóteo simu konvite atu rai didi'ak doutrina simu husi Paulo. Moris iha tempu erezia nian, animadór comunidade nian iha devér atu hanorin doutrina loos no defende comunidade husi buat hotu ne'ebé hadook husi lialoos Jezús nia Evanjellu nian.

EVANJELLU – LUCAS 17,5-10

Ita kontinua la'o tuir “dalan Jerusalém nian” no haree “lisaun” sira ne'ebé prepara eskolante sira ba dezafiu atu komprende no fó sasin kona-ba “Reinu”. Iha testu ne'e ita iha Jezús nia liafuan lona-ba fiar no ai-kanoik ida kona-ba haraik-an.

Liafuan kona-ba “fiar” okupa primeira parte Evanjellu ohin nian no hatudu ho modu diferente uitoan iha Mt 17, 20. Liafuan ne'e Lucas uza atu manifesta eskolante sira nia preokupasaun ho difikuldade atu la'o tuir dalan Reinu nian.

MENSAJEN

Primeira parte ita-nia testu nian, ko'alia kona-ba fiar (vers. 5-6). Hotu tiha Jezús nia apresentasuan kona-ba eziénsia sira kona-ba dalna atu to' o ba “Reinu”, resposta lójika ba buat ne'e la bele seluk maibé ida-ne'e de'it: “haboot ami-nia fiar”. Sá loos ligasuan entre fiar no eziénsia Reinu nian?

Iha Testamentu Foun, fiar la'ós adezaun ba dogma eh konjuntu ida lialoos sira nian kona-ba Maromak; maibé adezaun ba Jezús, ba Ninia proposta, ba Ninia projetu – katak projetu “Reinu” nian. Maski nune'e, eskolante sir akonxiente kona-ba dalan ne'ebé la'ós fasil no kómodu, basá supoin kompromisu radikál ida, vitória ba fragilidad erasik, korajen atu husik komodizmu no egoízm atu tuir dalan ezijénsia nian... Husu ba Jezús atu haboot signifika haboot aten-barani atu hili “Reinu” no ezijénsia husi “Reinu”; signifika husu atu fó desizaun atu adere ho modu inkondidionál ba proposta moris nian ne'ebé Jezús mai apresenta. Jezús aproveita okaziaun atu fó hanoin ba eskolante sir akona-ba rezultadu husi fiar. Ilas ne'ebé Jezús kona-ba fokit ai-hun no kuda iha tasi laran, hatudu katak, ho fiar buat hotu bele: bainhira adere ba Jezús no ba “reinu” ho aten-barani no determinasaun, buat ne'e implika transformasaun ida ba mundu ne'ebé hale'u. Adere ba Reinu ho radikalidade katak kaer xave atu muda istória, maski haree ba hanesan imposivel... Eskolante ne'ebé adere ba “Reinu” ho aten-barani no determinasaun nia iha kapasidade ba “milage auténtiku”... Dala hira mak Jezús nia eskolante sira nia aten-barani no kbiit nakfilak mate ba moris, dezesperu ba esperansa, moris-atan ba liberdade!

Iha testu nia segunda parte (vers. 7-10), Lucas deskreve atitude ne'ebé ema tenke asume iha Maromak nia oin. Farizeu sira hanoin katak se em akumpre Torah Maromak la bele halo baut seluk selae salva ema. Nune'e salvasaun mak ema nia méritu. Maromak mak kontabilista ida, atu halo konta sei ema iha direitu eh lae ba salvasaun...

Jezús tau sasán sira iha dimensaun doferente. Atitude eskolante nian – eskolante ne'ebé adere ba Jezús no ba “Reinu”, ne'ebé halo obra sira Reinu nian no harii Reinu – iha Maromak nia oin nia la bele sente katak nia halo baut hotu di'ak no nune'e, Maromak deve nia buat ruma; maibé tenke iha atitude ema ida nian ne'ebé kumpre ho haraik-an ninia knaar, hanesan atan ne'ebé halo buat ne'ebé nia tenke halo.

Buat ne'ebé Jezús husu iha Evanjellu ohin nian mak atu ita la'o dalan “Reinu” nian ho aten-barani no empenú. Bainhira eskolante aseita halo dalan ida-ne'e, nia iha kbiit atu halo milagre sira ne'ebé nakfilak mundu... No, kumpre tiha misaun, eskolante nia atitude mak atan haraik-an ida nian iha Maromak nia oin, hodi agradese ba Ninia don sira, no saran an ho konfiansa no haraik-an iha Ninia liman.